



Eich cyf/Your ref
Ein cyf/Our ref LF/CS/1240/14

David Melding AC
Cadeirydd
Pwyllgor Materion Cyfansoddiadol a Deddfwriaethol
Cynulliad Cenedlaethol Cymru
Tŷ Hywel
Bae Caerdydd
Caerdydd
CF99 1NA

2 Rhagfyr 2014

Annwyl David Melding AC

Bil Cynllunio (Cymru) – Pwyllgor Materion Cyfansoddiadol a Deddfwriaethol – Rhagor o Wybodaeth

Diolch am fy ngwahodd i'r Pwyllgor Materion Cyfansoddiadol a Deddfwriaethol ar 10 Tachwedd 2014 i roi tystiolaeth ar Fil Cynllunio (Cymru).

Yn y cyfarfod, ymrwymais i roi rhagor o wybodaeth i'r Pwyllgor ynghylch nifer o bynciau. Mae'n bleser nawr cael rhoi'r wybodaeth honno. Mae hi i'w gweld isod, gyda rhagor o fanylion i esbonio rhai pwyntiau a godwyd gan Aelodau'r Pwyllgor. Rwyf am ddelio â phob pwynt yn ei dro:

1. Disgrifio'r gorgyffwrdd rhwng y Biliau Cynllunio, Llesiant Cenedlaethau'r Dyfodol a'r Amgylchedd

Gweler yn amgaaedig yn Atodiad 1 y ddogfen y cyfeiriais ati yn y Pwyllgor. Mae'n esbonio'r cysylltiadau rhwng y Bil Cynllunio, Bil Llesiant Cenedlaethau'r Dyfodol a Bil yr Amgylchedd.

2. Manylion ceisiadau Rhyddid Gwybodaeth o ran y broses cyn ymgeisio. Ceisiadau Rhyddid Gwybodaeth a sut mae hyn yn gweithio gyda'r broses cyn ymgeisio?

Bydd yr is-ddeddfwriaeth sy'n ymdrin â gwasanaethau cyn ymgeisio yn darparu pryd y bydd angen gwasanaethau cyn ymgeisio, natur y gwasanaeth a'r gofyn i gyhoeddi dogfennau a gwybodaeth. Bydd hyn yn ei gwneud yn ofynnol i awdurdodau cynllunio lleol a Gweinidogion Cymru gadw cofnodion y gwasanaethau cyn ymgeisio a

chyhoeddi gwybodaeth am y mathau o wasanaethau cyn ymgeisio a ddarperir. Bydd hyn yn sicrhau bod y broses yn agored ac yn dryloyw ac yn sicrhau na all y gwasanaethau cyn ymgeisio fod yn destun llygredd na chamdrin ariannol.

Os caiff Llywodraeth Cymru neu awdurdod cynllunio lleol gais Rhyddid Gwybodaeth am wybodaeth a ddelir ar wasanaethau cyn ymgeisio, bydd yn rhaid ei datgelu. Fodd bynnag, wrth benderfynu p'un ai i ryddhau gwybodaeth ai peidio, bydd hynny'n dibynnu a oes ymrwymiad ar y corff cyhoeddus i ddiogelu'r wybodaeth honno. Wrth ddatgelu gwybodaeth, rhaid i gorff cyhoeddus ddilyn y cyfreithiau sy'n ymwneud â thrin gwybodaeth. Ceir tri darn o ddeddfwriaeth sy'n rheoli sut i drin ceisiadau am wybodaeth:

- Deddf Diogelu Data (DPA) 1998.
- Deddf Rhyddid Gwybodaeth (FOIA) 2000.
- Rheoliadau Gwybodaeth Amgylcheddol (EIR) 2004.

Dywedais yn ystod y broses graffu y byddai angen imi ofyn a oes gennym Gymhwysedd mewn cysylltiad â cheisiadau Rhyddid Gwybodaeth, hynny mewn perthynas â chael cyngor ar effaith datgelu gwybodaeth ar hawliau dynol. Rwyf wedi cael cadarnhad nad oes problemau o ran cymhwysedd ynghylch datgelu gwybodaeth.

3. Ystyr Datblygiadau o Arwyddocâd Cenedlaethol; (DNS).

Yn Cynllunio Cadarnhaol, ymgynghorais ar y cynnig mai Gweinidogion Cymru fydd yn penderfynu ar geisiadau a ddiffinnir fel Datblygiadau o Arwyddocâd Cenedlaethol (DNS). Dyma'r diffiniad o Ddatblygiad o Arwyddocâd Cenedlaethol yn Cynllunio Cadarnhaol:

“... (ni) cheir llawer ohonynt o ran eu nifer ond (maent yn) bwysig iawn i Gymru oherwydd eu manteision a'u heffeithiau posibl. Gall materion technegol cymhleth fod yn gysylltiedig â hwy ... Yn y pen draw, mae llawer o'r ceisiadau hyn eisoes yn cael eu cyflwyno i Weinidogion Cymru benderfynu arnynt, naill ai drwy gael eu galw i mewn, neu, fel rhan o apêl...”

Cafodd y categorïau a'r trothwyon a gynigir ar gyfer DNS eu cyhoeddi yn Atodiad B, sydd wedi'i atgynhyrchu yn Atodiad 2 y papur hwn. Roedd bron 70% o'r ymatebwyr yn cytuno â'r categorïau yn Atodiad B a dywedodd rhai nad oedd gan yr ACLlau yr arbenigedd angenrheidiol i allu ymdrin â rhai o'r materion. Dywedwyd hefyd y dylai'r meini prawf ar gyfer DNS fod yn ddigon hyblyg iddynt allu cael eu newid neu eu hestyn.

Holwyd hefyd yn Cynllunio Cadarnhaol ynghylch y broses ar gyfer ystyried y ceisiadau hyn, gan gynnwys yr angen am ymgynghoriad gorfodol cyn ymgeisio. Roedd 97% yn cytuno â'r cynnig hwn. Yn yr un modd, cafwyd cefnogaeth fawr i godi ffioedd am gyngor cyn ymgeisio ar geisiadau o arwyddocâd cenedlaethol.

O ran caniatadau cysylltiedig, roedd mwyafrif yr ymatebwyr, 81%, yn cytuno â'r cynnig ar gyfer trin caniatadau cysylltiedig gan gredu y deuai â buddiannau, gan gynnwys ystyriaeth fwy cynhwysfawr i gais ac y byddai un corff penderfynu'n cyflymu'r broses. Dywedwyd hefyd gan ymatebwyr y byddai'r cyhoedd a'r rheini yr

ymgynghorir â nhw yn eiwa ar y broses gan y byddent yn gallu llwyr ystyried effeithiau cynllun yn ei gyfanrwydd ar ddechrau'r broses ymgysylltu.

Ymdrinnir â Datblygiadau o Arwyddocâd Cenedlaethol yn y Fframwaith Datblygu Cenedlaethol (FfDC) fydd yn destun ymgynghoriad cyhoeddus am 12 wythnos, gyda Gweinidogion Cymru yn ei ystyried wedi hynny. Caiff drafft terfynol yr FfDC ei roi ger bron y Cynulliad am gyfnod o 60 diwrnod iddo ei gymeradwyo. Dim ond y datblygiadau hyn a'r rheini sy'n bodloni'r amodau yn y rheoliadau fydd yn cael eu cyfrif fel Datblygiadau o Arwyddocâd Cenedlaethol. Gellir arolygu ac adolygu'r FfDC unrhyw bryd cyn belled â'i fod yn cael ei graffu ymhellach. Caiff arweiniad ei gyhoeddi yn disgrifio'r broses hon.

- 4. Y rhesymau dros ddefnyddio gweithdrefnau negyddol a chadarnhaol mewn cysylltiad â'r adrannau newydd sydd wedi'u mewnosod gan adrannau 44 a 45 y Bil yn Neddf Cynllunio Gwlad a Thref 1990. Yn arbennig, o gofio bod adran 44 a pharagraff 18 Atodlen 4 y Bil yn gosod beichiau ariannol ar y cyhoedd, pam ydych chi wedi dewis y weithdrefn gadarnhaol ar gyfer paragraff 18 Atodlen 14 (a fewnosodir gan adran 303(1B)) a'r weithdrefn negyddol ar gyfer adran 44 (a fewnosodir gan adran 322C).**

Mae paragraff 18 Atodlen 4 yn ymdrin â'r ffioedd a godir gan Weinidogion Cymru mewn cysylltiad â'u swyddogaeth pan gyflwynir cais iddynt. Codir am y ffioedd hyn cyn gwneud cais a gallai olygu rhai beichiau ariannol ar yr ymgeisydd. Mae'r gwelliant yn mewnosod darpariaethau yn adran 303 Deddf Cynllunio Gwlad a Threfn 1990 ac mae'r rheoliadau yn yr adran honno eisoes o dan y weithdrefn gadarnhaol.

Ar y llaw arall, mae adran 322C yn ymdrin â chostau y mae Gweinidogion Cymru neu bartïon cais, apêl neu atgyfeiriad at Weinidogion Cymru wedi'u hysgwyyddo. Bydd Gweinidogion Cymru yn cael gorchymyn yr ymgeisydd, yr apelydd, yr atgyfeirydd, yr awdurdod cynllunio lleol neu barti arall i dalu am y costau hyn neu ran ohonynt. Gallai Gweinidogion Cymru hefyd wneud gorchymyn ynghylch costau'r ymgeisydd, apelydd neu barti arall. Bwriad yr adran hon yw sicrhau, os yw parti wedi ymddwyn yn afresymol, bod dyfarniad yn gallu cael ei roi i bartïon eraill i ad-dalu iddynt y gost ychwanegol y bu'n rhaid iddynt ei hysgwyyddo o ganlyniad i'r ymddygiad afresymol. Caiff Gweinidogion Cymru bennu swm dyddiol safonol sy'n adlewyrchu'r costau hynny. Bwriedir i'r swm dyddiol safonol adlewyrchu'r swm a wariwyd gan Weinidogion Cymru. Gallai newid yn rheolaidd yn ôl ffactorau economaidd a staffio. Bwriedir i'r costau adlewyrchu'r costau adeg delio â'r achos ac o'r herwydd, rhaid wrth hyblygrwydd.

Y gwahaniaeth pennaf rhwng yr adran hon ac adran 303 yw fel a ganlyn. O dan adran 303, rhaid talu ffioedd cynllunio ac eraill, waeth beth yw'r amgylchiadau. Mae'r ffioedd a bennir yn yr adran hon i bob pwrpas yn pennu lefel yr incwm y bydd awdurdodau cynllunio lleol yn ei dderbyn wrth wneud eu gwaith rheoli datblygu. Yr unig amrywiad yw'r newid yn nifer y ceisiadau a ddaw i law. Ar y llaw arall, o dan adran 322C, rhaid i orchymyn costau adlewyrchu'r costau sydd wedi'u hysgwyyddo (bydd gofyn iddynt fod yn rhesymol yn achos rhai Gweinidogion Cymru, yn unol ag egwyddorion y gyfraith gyhoeddus). Canlyniad i ymddygiad yr ymgeisydd, apelydd

neu berson arall y rhoddir gorchymyn iddo yw'r costau hyn. Gellid mewn gwirionedd fod wedi osgoi'r "baich ariannol" trwy beidio ag ymddwyn yn afresymol.

Mae'r darpariaethau cyfredol sy'n ymwneud â chostau i'w gweld yn adran 42 Deddf Tai a Chynllunio 1986 ac adran 250 Deddf Llywodraeth Leol 1972. Mae adran 322C, ymhlith pethau eraill, yn dod â'r drefn gostau ar gyfer penderfyniadau cynllunio i gyd mewn un lle. Ceir darpariaeth yn adran 42 Deddf Tai a Chynllunio 1986 hefyd sy'n galluogi Gweinidogion Cymru i bennu swm dyddiol safonol yn unol â'r weithdrefn negyddol.

Yn ogystal â'r wybodaeth y cytunais i'w darparu yn y Pwyllgor, rydych yn gofyn yn eich llythyr am fwy o fanylion ynghylch nifer o gwestiynau. Dyma atebion manwl isod i'r cwestiynau hynny:

1. Pam o dan Atodlen 4D, paragraff 1(2) Deddf Cynllunio Gwlad a Thref 1990 (a fewnosodir gan Atodlen 3, paragraff 1) y caiff "swyddogaeth benodedig" (*specified function*) ei diffinio yn y rheoliadau yn hytrach nag ar wyneb y Bil?

Rhagwelir y caiff yr Arolygiaeth Gynllunio ei phenodi i gynnal rhai swyddogaethau mewn cysylltiad â cheisiadau uniongyrchol opsiynol, fel derbyn ceisiadau, dewis y rhai yr ymgynghorir â nhw, ystyried ymatebion a phenderfynu ar geisiadau. Ar gyfer ceisiadau DNS, disgwylir i'r Arolygiaeth Gynllunio gynnal swyddogaethau gweinyddol ac ystyried y cais DNS, ond Gweinidogion Cymru yn unig fydd â'r hawl i benderfynu ar y cais. Lle bo'n fwy effeithiol i awdurdod cynllunio lleol gynnal rhai pethau (fel codi hysbysiad y safle), ceir darpariaeth yn y Bil i alluogi Gweinidogion Cymru orchymyn ACLlau i gynnal rhai swyddogaethau.

Ceir pwerau yn Atodlen 6 Deddf Cynllunio Gwlad a Thref 1990 i benodi a/neu ddiddymu neu newid y personau a benodir unrhyw bryd. Yn ôl Atodlen 4D, ceir gwneud hyn hefyd mewn cysylltiad â cheisiadau uniongyrchol opsiynol a DNS. Rhaid wrth is-ddeddfwriaeth er mwyn rhagnodi swyddogaethau penodol ar gyfer y personau a benodir, yn hytrach na bod y penodiadau'n cael eu gwneud yn unol â gofyn yr achos. Bydd hyn yn rhoi hyblygrwydd i Weinidogion Cymru gynnal rhai tasgau os gwelant fod angen hynny.

Gallai fod yn briodol hefyd adolygu'r ddeddfwriaeth hon yn rheolaidd, wrth i weithdrefnau'r DNS a'r ceisiadau uniongyrchol opsiynol gael eu monitro a'u diweddarau.

Ystyrir bod y weithdrefn negyddol yn briodol gan mai manylyn cymharol ddi-nod yw hwn mewn cynllun deddfwriaethol sy'n rhagnodi'r swyddogaethau y bydd Arolygydd yn hytrach na Gweinidogion Cymru yn eu cynnal. Hefyd, nid yw'r darpariaethau'n rhoi pwerau galluogi i newid y ddeddfwriaeth sylfaenol, yn rhoi pwerau arwyddocaol i Weinidogion Cymru, yn cynyddu neu'n gosod beichiau ariannol arwyddocaol ar y cyhoedd, nac yn creu nac yn rhoi pwerau anarferol. Ceir pwerau tebyg yn Atodlen 6 Deddf Cynllunio Gwlad a Thref 1990 mewn

cysylltiad ag apelau ac achosion a elwir i mewn. Daw'r rhain o dan y weithdrefn negyddol.

- 2. A fyddai'r pŵer i wneud rheoliadau o dan Atodlen 4D, paragraff (1)(3) Deddf Cynllunio Gwlad a Threfn 1990 (a fewnosodir gan Atodlen 3, paragraff 1) yn cynnwys y pŵer i newid deddfwriaeth sylfaenol ac os byddai, pam mai'r weithdrefn negyddol sy'n briodol?**

Ffrwynir y pŵer o dan sylw i'r graddau y caniateir ei ddefnyddio i roi'r ddarpariaeth yn erthyglau 1(1) ac 1(2) ar waith. Nid yw'n galluogi Gweinidogion Cymru i newid deddfwriaeth sylfaenol. Nid oes unrhyw beth ar wyneb y Bil sy'n awgrymu bod paragraff 1(3) yn cynnwys pŵer i newid deddfwriaeth sylfaenol, a phe bwriedir i'r ddarpariaeth roi pŵer o'r fath, gellid disgwyl gweld cyfeiriad penodol at hynny yn yr adran.

- 3. Beth yw'r rhesymeg dros ddefnyddio'r weithdrefn negyddol wrth wneud gorchymyn o dan adran 75A(1) Deddf Cynllunio Gwlad a Thref 1990 (a fewnosodir gan Atodlen 4, paragraff 7) o gofio sgôp gorchymyn o'r fath i newid deddfwriaeth sylfaenol?**

Mae Atodlen 4(7) yn mewnosod Adran 75A yn TCPA 1990. Pwrpas adran 75A yw caniatáu i orchymyn datblygu gymhwyso (neu ddatgymhwyso) deddfwriaeth arall rhag iddi amharu ar allu Gweinidogion Cymru i benderfynu ar geisiadau DNS, ceisiadau uniongyrchol opsiynol neu geisiadau cysylltiedig.

Mae'n debygol y bydd y gweithdrefnau ar gyfer y ddau fath o gais yn efelychu gymaint â phosibl y prosesau a'r gofynion a ddilynir fel arfer wrth gyflwyno cais i awdurdod cynllunio lleol. Hynny er mwyn sicrhau trefn gyson a chyfarwydd i randdeiliaid, gan gynnwys yr ymgeisydd, y gymuned leol a'r ymgynghoreion statudol. Er mwyn sicrhau proses mor debyg â phosibl, mae Adran 75A(1) yn galluogi defnyddio darpariaethau o ddeddfau cynllunio eraill, gan newid neu beidio â newid ceisiadau a wneir yn uniongyrchol iddynt, gan gynnwys ceisiadau 'cysylltiedig'.

Bydd y pŵer hyn yn caniatáu defnyddio prosesau a gofynion sy'n bod eisoes ar gyfer gwneud cais i awdurdodau cynllunio lleol wrth wneud cais uniongyrchol i Weinidogion Cymru. Er enghraifft:

- Y gofynion sy'n bod eisoes ar gyfer gwneud cais dilys, fel ffurf y cais a dull ei gyflwyno yn ogystal â'r wybodaeth a gynhwysir gydag e.
- Y gofynion o ran cyhoeddusrwydd ac ymgynghori.
- Ffurf a chynnwys hysbysiad y penderfyniad.

Ystyrir bod y weithdrefn negyddol yn briodol gan fod y ddarpariaeth yn rhagnodi materion gweithredol sy'n ymwneud â gwneud cais a phenderfynu arno. Bydd rhai ohonynt yn cynnwys creu trefniadau ar gyfer dilysu ceisiadau, y cyhoeddusrwydd y mae'n rhaid ei roi a'r mater o hysbysu penderfyniad.

Rhaid wrth yr hyblygrwydd hefyd i newid y trefniadau ymgeisio o dro i dro er mwyn ymateb i amgylchiadau newydd. Er enghraifft, gyda'r gweithdrefnau ar gyfer y ddau fath o gais yn debygol o efelychu'r rhai sy'n bod eisoes, efallai y bydd angen i unrhyw newidiadau i'r gweithdrefnau presennol o dan is-ddeddfwriaeth gyfredol sydd eisoes o dan y weithdrefn negyddol adlewyrchu hefyd ceisiadau uniongyrchol i Weinidogion Cymru. Diben hynny fyddai sicrhau trefniadau cyson i randdeiliaid, gan gynnwys ymgeiswyr, y gymuned leol a'r ymgynghoreion statudol.

Nid yw Adran 75A yn galluogi Gweinidogion Cymru i newid deddfwriaeth sylfaenol o dan unrhyw amgylchiadau. Y pŵer a geir yn yr adran honno yw'r pŵer i alluogi Gweinidogion Cymru i ddarparu mewn gorchymyn datblygu bod deddfiad neu ofyniad (fel y'i diffinnir yn adran 75A(2)) yn gymwys, gyda neu heb newidiadau, neu ddarparu nad yw'n gymwys, yng nghyd-destun cul ceisiadau a wneir i Weinidogion Cymru, er mwyn sicrhau bod y darpariaethau perthnasol yn effeithlon.

- 4. Yng ngoleuni achosion yr Uchel Lys am bwysigrwydd trafodion y Cynulliad a dogfennau a gynhyrchir gan y Cynulliad neu Lywodraeth Cymru wrth ystyried cymhwysedd, a fyddai Llywodraeth Cymru'n barod i rannu asesiad hawliau dynol fydd wedi'i gynnal wrth baratoi'r bil â'r Pwyllgor?**

Ystyrir bod materion sy'n ymwneud â hawliau dynol mewn cysylltiad â'r Bil yn rhan o'r cyngor cyfreithiol cyffredinol a roddwyd i'r Gweinidogion. Diogelir pob cyngor cyfreithiol gan Ffaint Proffesiynol Cyfreithiol.

Mae Llywodraeth Cymru'n credu bod y cynigion a geir yn y Bil yn gyson â Hawliau'r Confensiwn, hynny am fod y system gynllunio o'i hanfod yn gorfod cadw'r ddysgl yn wastad rhwng hawliau'r unigolyn a buddiannau'r gymuned ehangach.

- 5. Mae'r deddfwriaeth cynllunio gwlad a thref eisoes yn rhwymo'r goron. A fydd y newidiadau sy'n cael eu gwneud gan y Bil hefyd yn rhwymo'r Goron? Os ydyn nhw, oni fyddai'n well datgan hynny'n glir?**

Mae Deddf Cynllunio a Phrynu Gorfodol 2004 a Deddf Cynllunio Gwlad a Thref 1990 yn rhwymo'r Goron ac o'r herwydd, bydd y newidiadau a wneir i'r Deddfau hyn trwy'r Bil hwn, hefyd yn rhwymo'r Goron. Nid oes angen felly datgan hynny.

- 6. Ydy Llywodraeth Cymru'n credu bod angen cydsyniad y Frenhines a/neu'r Tywysog ar gyfer y newidiadau a wneir i'r deddfau cynllunio gwlad a thref gan y Bil, ac os ydyw, pam?**

Fel y mae pethau ar hyn o bryd, dwi dim yn creu bod angen cydsyniad y Frenhines na'r Tywysog ar gyfer y Bil. Mae'r cydsyniad sydd eisoes wedi'i roi i Ddeddf Cynllunio a Phrynu Gorfodol 2004 yn ddigon gan nad yw'r newidiadau y

mae'r Bil yn eu gwneud yn effeithio ar fuddiannau'r Goron mewn ffordd sylweddol.
Cedwir golwg ar yr agwedd hon wrth i'r Bil fynd ar ei daith trwy'r Cynulliad.

Rwy'n hyderus bod fy ymatebion i'r Pwyllgor a'r wybodaeth ychwanegol rwyf wedi'i darparu wedi helpu Gweinidogion i graffu ar Fil Cynllunio (Cymru). Os oes gennych chi neu unrhyw Aelod gwestiynau eraill neu os hoffech ragor o wybodaeth am unrhyw agwedd, croeso ichi gysylltu â fi.

Rwy'n anfon copi o'r llythyr hwn at Gadeirydd Pwyllgor yr Amgylchedd a Chynaliadwyedd.

Yn gywir



Carl Sargeant AC / AM
Y Gweinidog Cyfoeth Naturiol
Minister for Natural Resources

Copi at: Cadeirydd Pwyllgor yr Amgylchedd a Chynaliadwyedd

Deddfwriaeth dros ddatblygu cynaliadwy i sicrhau llesiant tymor hir Cymru


I Gymru allu datblygu'n gynaliadwy, mae angen newid y gyfraith er mwyn darparu'r prif elfennau sydd eu hangen i hyn allu digwydd:

Syniad clir o'r hyn rydym yn anelu ato a deall y prif egwyddorion fydd yn ein harwain ato;
Darlun clir o'r adnoddau naturiol sydd gennym, y peryglon sy'n eu hwynebu a'r cyfleoedd y maen nhw'n eu cynnig; a
Proses effeithiol i sicrhau bod y datblygiad iawn yn digwydd yn y lle iawn i wneud i hynny ddigwydd.



I'n helpu i wireddu'r amcanion, rhaid inni gynllunio sut ydym yn defnyddio'n tir a sut bydd ein dinasoedd, trefi a chymunedau'n newid dros amser

- Gyda **system sy'n seiliedig ar gynllun**, rhaid i Awdurdodau Cynllunio Lleol ddeall beth sydd ei angen ar eu cymunedau. Bydd dyletswydd ar Awdurdodau Cynllunio Lleol i ystyried y 'cynllun llesiant lleol' a gyhoeddir gan y Bwrdd Gwasanaethau Cyhoeddus (PBS)
- Trwy ymwneud yn fwy yn y **cam cyn ymgeisio**, bydd cymunedau yn cael cyfrannu'n fuan yn y broses gynllunio i ddylanwadu ar gynigion datblygu.
- Bydd **Cynlluniau Datblygu Strategol** yn canolbwyntio ar feysydd sy'n bwysicach na'r lleol. Yr allwedd yw ymdrin â datblygu sydd o natur strategol. .
- Bydd y **Fframwaith Datblygu Cenedlaethol** yn nodi blaenoriaethau Llywodraeth Cymru o ran defnyddio tir.



Rhaid cysylltu'r ffordd rydym yn defnyddio'n tir â'r ffordd rydym yn rheoli'n hadnoddau naturiol.

- **Rheoli adnoddau naturiol** - yn dylanwadu ar ffaenoriaethau a chyfleoedd trwy dystiolaeth ar sail ardal.
- **Sail tystiolaeth** sy'n fwy cyson a phroactif ac wedi'i blaenoriaethu, ar gyfer defnyddio adnoddau naturiol i gyd-fynd ag amcanion cenedlaethol a lleol
- Cyfleoedd wedi'u blaenoriaethu i fod yn sail ar gyfer penderfyniadau a sicrhau'r **datblygiad iawn** i gefnogi cynllunio positif.

Mae ein hadnoddau naturiol yn hanfodol inni allu sicrhau llesiant Cymru gynaliadwy:

- Adlewyrchir cydnerthedd a'r ffordd y defnyddir ein hadnoddau naturiol yn y 6 **amcan** llesiant
- Mae Cyfoeth Naturiol Cymru yn un o'r 44 o **gyrff cyhoeddus** sy'n dod o dan y ddyletswydd datblygu cynaliadwy ac sy'n aelod o **Banel Cyngori Comisiynydd Cenedlaethau'r Dyfodol** Cymru.
- Yr **Adroddiad ar Gyflwr Adnoddau Naturiol (SoNaRR)** fydd yn darparu'r sail dystiolaeth ar gyfer ein hadnoddau naturiol gan ddylanwadu ar Fyrddau Gwasanaethau Cyhoeddus wrth iddynt asesu llesiant.
- Bydd Cyfoeth Naturiol Cymru'n aelod statudol o bob **Bwrdd Gwasanaethau Cyhoeddus**, gan gefnogi partneriaethau ar draws y sector cyhoeddus i wneud y gorau o'u cyfraniad at yr amcanion llesiant.
- Bydd **datganiadau ardal** yn nodi anghenion, cyfleoedd a heriau lleol o fewn cyd-destun cynlluniau rheoli adnoddau lleol a llesiant lleol.

Dosbarthiadau Ceisiadau Cynllunio - Trothwyon a Meini Prawf

Datblygiadau Cenedlaethol eu Harwyddocâd (DNS)

Rhestrir y categorïau a'r trothwyon arfaethedig isod.

Math o Gais	Trothwy
Cyfleusterau Storio Nwy Tanddaearol nas adeiladwyd gan gwmni cludo nwy, at ddibenion storio nwy o dan y ddaear mewn ceudodau neu strata anhydraidd	Capasiti gweithio o 43 miliwn o fetrau ciwbig safonol o leiaf neu uchafswm cyfradd llif o 4.5 miliwn o fetrau ciwbig safonol o leiaf y dydd.
Newid unrhyw fath o gyfleuster storio nwy tanddaearol	Capasiti gweithio o 43 miliwn o fetrau ciwbig safonol o leiaf neu uchafswm cyfradd llif o 4.5 miliwn o fetrau ciwbig safonol o leiaf y dydd.
Cyfleusterau Nwy Naturiol Hylifedig (LNG)	Capasiti storio o 43 miliwn o fetrau ciwbig safonol o leiaf neu uchafswm cyfradd llif o 4.5 miliwn o fetrau ciwbig safonol o leiaf y dydd.
Cyfleusterau Derbyn Nwy	Lle y disgwylir y bydd yr uchafswm cyfradd llif yn fwy na 4.5 miliwn o fetrau ciwbig safonol y dydd.
Piblinellau a adeiladwyd gan Gwmni Cludo Nwy	Piblinellau a adeiladwyd gan Gwmni Cludo Nwy sydd: yn fwy na 800 milimetr mewn diamedr ac yn fwy na 40 kilometr o hyd neu y byddent yn debygol o gael effaith sylweddol ar yr amgylchedd; â phwysedd gweithredu wedi'i ddylunio o fwy na 7 lled bar; cludo nwy i'w gyflenwi (yn uniongyrchol neu'n anuniongyrchol) i o leiaf 50,000 o gwsmeriaid, neu ddarpar gwsmeriaid, un cyflenwr nwy neu fwy.
Gwaith datblygu ac adeiladu sy'n gysylltiedig â maes awyr	Cynyddu'r capasiti o 10 miliwn o deithwyr y flwyddyn, neu dros 10,000 o achosion o gludo nwyddau drwy'r awyr y flwyddyn.
Cyfleusterau harbwr	Yn achos cyfleusterau ar gyfer llongau amlwyth: unrhyw beth islaw 500,000 TEU;

Cynllunio Cadarnhaol: Ymgynghoriad ar gynigion i ddiwygio'r system gynllunio yng Nghymru - Atodiad B

	<p>Yn achos llongau 'ro-ro': unrhyw beth islaw 250,000 o unedau;</p> <p>Yn achos cyfleusterau ar gyfer llongau cargo o unrhyw ddisgrifiad arall, unrhyw beth islaw 5 miliwn o dunelli.</p> <p>Yn achos trothwyon cymysg, yr effeithiau cronol sydd o fewn yr uchod ond heb fod yn uwch (caiff unrhyw beth uwch ei benderfynu o dan y gyfundrefn Prosiectau Seilwaith Cenedlaethol eu Harwyddocâd (NSIP) yng Nghymru).</p> <p>Mae'r uchod yn berthnasol onid yw'n 'ddatblygiad a ganiateir' o dan Ddosbarthiadau B a D o Ran 17 o Atodlen 2 i Orchymyn Cynllunio Gwlad a Thref (Datblygiad Cyffredinol a Ganiateir) 1995.</p>
Rheilffyrdd	<p>Gwaith i'r rhwydwaith rheilffyrdd cenedlaethol nas cwmpesir gan hawliau datblygu a ganiateir (fel y'u cynhwysir yn Erthygl 3 o Orchymyn Cynllunio Gwlad a Thref (Datblygu Cyffredinol a Ganiateir) 1995); gwaith sydd ar hyd parhaus o fwy na 2 kilometr, nad yw ar dir a oedd naill ai'n dir gweithredol yn perthyn i gwmni rheilffordd yn union cyn i'r gwaith ddechrau neu sydd ar dir a gaffaelwyd yn gynharach at ddibenion y gwaith. Nid yw hyn yn cynnwys gwaith a gynhelir ar dir gweithredol yn perthyn i gwmni rheilffordd oni chaffaelwyd y tir hwnnw at ddiben y gwaith hwnnw.</p>
Cyfnewidfeydd rheilffyrdd nwyddau	<p>Cyfnewidfeydd sy'n cwmpasu o leiaf 60 hectar a lle yr ymdrinnir ag o leiaf bedwar trên nwyddau bob dydd.</p>
Argaeau a chronfeydd d r	<p>Yn gallu dal neu storio mwy na 10 miliwn o fetrau ciwbig o dd r.</p>
Trosglwyddo adnoddau d r	<p>Yn gallu trosglwyddo mwy na 100 miliwn o</p>

	fetrau ciwbig o dd r y flwyddyn.
Safle trin d r gwastraff	Yn meddu ar gapasiti uwch na'r capasiti a all ymdrin â phoblogaeth sy'n cyfateb i 500,000 o bobl.
Cyfleusterau gwastraff peryglus	Safleoedd tirlenwi neu storfeydd dwfn a all ymdrin â mwy na 100,000 o dunelli y flwyddyn. Yn unrhyw achos arall, cyfleusterau a all ymdrin â mwy na 30,000 o dunelli y flwyddyn.
Piblinellau <u>nas</u> adeiladwyd gan gwmni cludo nwy	Piblinell islaw 16.093 km o hyd sy'n llwyr neu'n rhannol yng Nghymru.
Gorsafoedd cynhyrchu (ar y tir)	Unrhyw beth rhwng 25 megawatt a 49 megawatt, gan gynnwys y mesuriadau hynny.

Datblygiadau Mawr

Rhestrir y trothwyon a'r meini prawf cyfredol ar gyfer datblygiadau mawr o dan Erthygl 2 o Orchymyn Cynllunio Gwlad a Thref (Gweithdrefn Rheoli Datblygu) (Cymru) 2012/901 i Gymru. Rhestrir y trothwyon a'r meini prawf hyn isod.

Trothwyon a Meini Prawf ar gyfer Datblygiadau Mawr
(a) cloddio a gweithio mwynau neu ddefnyddio tir ar gyfer dyddodion gweithio mwynau (i gael diffiniad o “dyddodion gweithio mwynau” gweler adran 336 o'r Ddeddf Cynllunio Gwlad a Thref (c.8))
(b) datblygu gwastraff
(c) darparu anhedd-dai lle— (i) mae nifer yr anhedd-dai a gaiff eu darparu yn 10 neu'n fwy; neu (ii) caiff y datblygiad ei godi ar safle ag arwynebedd o 0.5 hectar neu fwy ac nid yw'n hysbys p'un a yw is-baragraff (c) (i) yn berthnasol i'r datblygiad.
(d) darparu adeilad neu adeiladau lle mae arwynebedd y llawr i'w greu gan y datblygiad yn 1,000 o fetrau sgwâr neu fwy

Cynllunio Cadarnhaol: Ymgynghoriad ar gynigion i ddiwygio'r system gynllunio yng Nghymru - Atodiad B

(e) datblygiad a godir ar safle ag arwynebedd o 1 hectar neu fwy

Datblygiadau Lleol

Mae datblygiad lleol yn unrhyw gynnig datblygu nad yw'n bodloni'r categorïau ar gyfer datblygiadau cenedlaethol eu harwyddocâd a datblygiadau mawr, oni chaiff ei ddiffinio fel datblygiad a ganiateir. Diffinnir y mathau o ddatblygiad sy'n cynnwys datblygiad a ganiateir yng Ngorchymyn Cynllunio Gwlad a Thref (Datblygu Cyffredinol a Ganiateir) 1995/418 i Gymru (fel y'i diwygiwyd) (dolenni i ddeddfwriaeth fel a ganlyn: <http://www.legislation.gov.uk/uksi/1995/418/contents/made>).